



PRESS SECRETARIAT

MINISTRY OF THE PRIME MINISTER & CABINET

Apia, Samoa

Telephone : (685) 63222 ext 746, 747, 748, (685) 24799, (685) 26397

Fax : (685) 26322 Email: pressesecretariat@samoa.ws

Press Release

17 Iulai 2008

1. Tatalaina Galuega Atinae mo le Malae Tapolo i Faleata.

Ua faamaonia e le Kapeneta le polokalame mo le tatalaina aloa'ia o le galuega mo le toe faaleleia o le Malae Tapolo i Faleata, o le a faia i le Aso Faraile, 18 Iulai 2008, i le itula e 3:00 i le afiafi.

E amata le polokalame i se sauniga lotu pu'upu'u, ma o le Saunoaga Autu o le a fofogaina e le Afioga i le Palemia, le Susuga Tuilaepa Sailele Malielegaoi. O le maea ai o le Sauniga, ona faasolo ai lea o le maimoaga i itu uma o lenei galuega mo le toe faaleleia o le Malae Tapolo i Faleata.

2. Fesoasoani mo le Asosi Tenisi a Samoa.

Ua faamaonia e le Kapenet le tuuina atu o se vaega tupe mo le Asosi Tenisi a Samoa, e fesoasoani ai mo tapenaga o le au Vaega Laiti mo le Tauvaga a le Pasefika i Sasa'e o le Tenisi, o le a faia i Tonga i le faaiuga o lenei masina.

O lenei tauvaga e mo atunuu o loo i le vaega i sasa'e o le Pasefika, e aofia ai Amerika Samoa, Atu Kuki, Tonga ma Samoa. Pe a mae'a lenei tauvaga, o le a filifilia se au mai Sasa'e o le Pasefika, e tauva ma au fili mai Sisifo ma Mātū o le Pasefika. O lenei tauvaga o le a faia i Fiti i le masina o Aokuso 2008. I le maea ai o lenei tauvaga, o le a filifilia loa se au a le Pasefika e malaga atu e taaalo ma au a Niu Sila ma Ausetalia i le vaitaimi o Tesema 2008 – Ianuari 2009.

O le au a Samoa e aofia ai ni alii se toafa, tamaitai e toalua, ma le faiaoga.

3. Malaga le Faatonu o le Savali i Amerika Samoa.

Ua faamaonia e le Kapeneta le auai atu o le Faatonu o le Savali, le Susuga Tupuola Terry Tavita, i le Faaliga o Tu ma Aganuu a le Pasefika e faia i Amerika Samoa, e afua atu i le aso Sa, 20 Iulai 2008.

O le auai atu o le Susuga ia Tupuola Terry Tavita i le Faaliga o Tu ma Aganuu a le Pasefika i Amerika Samoa, o le a maua ai faasalalauga ma faamaumauga a le Nusipepa o le Savali.

4. Malaga mai i Samoa o le Failautusi o le Vaifafo o le Iunaita Setete o Amerika

Ua faamaonia e le Kapiteneta le talimalo o Samoa i le malaga mai o le Failautusi o le Vaifafo o le Iunaita Setete Amerika, le Susuga Condoleeza Rice, e auai mai i se fono ma Minisita o Vaifafo o le Pasefika, i le aso 26 o Iulai 2008.

Ua mafua leni fono ona o le fia feiloa'i o le Susuga ia Condoleeza Rice ma Minisita o Vaifafo o le Pasefika e talanoaina ai ni mataupu o loo faatauaina pea e atunuu o le Pasefika i lo latou va ma Amerika, e pei o le siosiomaga, puipuiga, fefaatauaiga, ma femalagaiga. Ua faailoa mai foi le auai mai o Minisita o Vaifafo o le Pasefika i leni fono.

O le a faia le faaafefe aloa'ia, o le taumafataga o le aoauli i le Aggies Resort, ma o le a faaaauai ai nei talanoaga ona o le pu'upu'u o le taimi e i ai le Susuga ia Condoleeza Rice i Samoa.

O le faato'ā toe taunu'u mai leni o se Failautusi o le Vaifafo o le Iunaita Setete o Amerika i Samoa talu le asiasiga a George Shutz i Samoa i le 1986. O le Susuga ia Condoleeza Rice na tofia e le Peresetene o Amerika, le Susuga George Bush, e avea ma Secretary of State i le tausaga e 2005.

Polokalame Faatitai:

1:00 pm – Taunuu i le Malaevaalele o Faleolo;

1:15 pm – Fono ma le Afioga i le Palemia, le Susuga Tuilaepa Sailele Malielegaoi i le Aggies Resort;

1:30 pm – Fono ma Minisita o Vaifafo o le Pasefika;

2:30 pm – Taumafataga o le aoauli ma faaaui ai le fono;

3:30 pm – Fono ma le Au Faasalalau faapea ma puegā ata.

3:50 pm – Agai loa i le malaevaalele;

4:00pm – Tu'ua Samoa mo Honolulu.

5. Aso e faamamaluina ai le suiga o le itu o le auala e femalagaa'i ai.

O le Aso Sa, 6 o Setema 2009, o le aso lea ua atofaina i le finagalo o le Kapiteneta e faamamaluina ai le suiga o le itu o le auala e femalagaa'i ai. O le itula e fa i le vaveao (4:00 am) o lea lava aso, o le taimi lea e amata ai le faatinoga o leni suiga.

Ua fīngalo le Kapeneta e tatau ona vave faalauiloa le aso tonu ma le taimi e faatino ai le suiga o le itu o le auala e femalagaa’i ai, aua e maua ai se tulaga mautinoa ma maumaututu i fuafuaga a tagata lautele faapea gaoioiga faapisinisi, ma aveese ai se tulaga masalosalo ma le lē mautinoa, mo le fuafuaina o faaiuga fai faapisinisi faapea foi fuafuaga a le mamalu lautele.

Ua filifilia lenei aso ma le taimi aua e talafeagai ma le tuua o aoga. Ua talafeagai foi aua e o’o atu i lenei taimi, ua taoto lelei sauniuniga mulimuli i magāala, ae aupito i toaitiiti foi tagata e feoai i luga o auala, ma ua maea foi le Teuila.

6. Malaga le Afioga i le Palemia i Fiti.

O loo i ai nei le Afioga i le Palemia, Susuga Tuilaepa Sailele Malielegaoi, i Fiti e auai i le fono a le Komiti Faapitoa o Minisita o Malo o le Pasefika ma le Malo lē Tumau o Fiti, e usuia i le aso 15 – 16 Mati, 2008.

O le Afioga i le Palemia, o ia foi o le Minisita o le Matagaluega o le Vaifafo ma Fefa’atauaiga, faatasi ai ma Minisita o Vaifafo o Ausetalia, Papua Niu Kini, Niu Sila, Toga ma Tuvalu, latou te faatinoa le vaega o Minisita Sooupu e feiloai ma le Malo lē Tumau o Fiti. O le agaga maualuga ua faatuina ai lenei Vaega o Minisita Sooupu, o se taumafaiga a Malo o le Pasefika e tagatagai i tapenaga a Fiti mo le faataunuaina o lana palota lautele i le masina o Mati 2009, atoa ma le toe faafo’i o le faigamalo i faiga faatemokarasi.

O loo malaga faatasi le Afioga i le Palemia ma le Ofisa Sili o Pulega a le Matagaluega o le Vaifafo, Afioga Aiono Mose Sua.

7. Tofia le Ofisa Sili mo le Pulega o Fa’ailoga ma Tusi Pasi Tauāloa a Samoa.

Ua faamaonia e le Kapeneta le toe tofia o le Susuga ia Fepuleai Sinapi Molī e avea ma Ofisa Sili o le Pulega o Fa’ailoga ma Tusi Pasi Tauāloa a Samoa mo le isi tolu tausaga.

I le faasalalauina ai o lenei avanoa, e to’alua i la’ua sa tuuina ane a la’ua tusi talosaga, ma sa valaauina uma fo’i i laua mo faatalanoaga. O nei faatalanoaga sa faatino e se Komiti Faapitoa na filifilia e le Komiti Faatonu. I le maea ai o iloiloga, ua talia nei e le Komiti Faatonu le fautuaga a le Komiti Faapitoa e toe tofia le Susuga Fepuleai Sinapi Molī e avea ma Ofisa Sili o le Pulega o Fa’ailoga ma Tusi Pasi Tauāloa a Samoa mo le isi tolu tausaga, e amata mai i le aso 13 o Aperila 2008.

8. Faatupeina e le SIFA le Au Netipolo a Samoa.

Ua faamaonia e le Kapeneta le iugafono a le Komiti Faatonu a le SIFA mo le toe faauauina o le faatupeina o le Au Netipolo a Samoa mo taamilosaga netipolo faavaomalo.

E \$250,000 le aofai o le tupe na talosagaina ma e totogi muamua atu le \$125,000 pe a maea le sainiga o le Maliega Fou mo le faatupeina. O le vaega lona lua o lenei fesoasoani tupe ua fuafua e totogiina atu pe a manaomia e le Asosi Netipolo a Samoa.

O taamilosaga faavaomalo o loo fuafua le auai o le Au Netipolo a Samoa e aofia ai: Taamilosaga Netipolo a le Lalolagi e faia i Egelani, Mati 2009; Taamilosaga a Atunuu e Lima a Sigapoa, faia ia Aokuso 2008; ma le Taamilosaga o le Ipu o le Lalolagi a Tupulaga Talavou, faia i le Atu Kuki ia Iulai 2009.

E taua tele i le SIFA taamilosaga e faia i Europa ma Asia ona o fuafuaga faalauiloa a le SIFA, aemaise lava Asia, o le maketi autu lea a le SIFA.

9. Tatala Auala i Faleasiu.

Ua faamaonia e le Kapeneta le polokalame mo le tatalaina aloa'ia o le auala i Tauoo, Faleasiu i le itula e 2:00 i le aoauli o le aso Tofi, 17 Iulai 2008.

O le Saunoaga Autu o le a fofogaina e le Afioga i le Palemia, le Susuga Tuilaepa Sailele Malielegaoi, ma o le o'oti'ina o le Lipine o le a faatino lea e le Minisita o Galuega, Felauaiga ma Atinae Ese'ese, le Afioga Tuisugaletaua A S Aveau.

O lenei galuega sa fausia e le Kamupani o le Lucky Construction i lalo o se poloketi a le Matagaluega o Galuega, Felauaiga ma Atinae Ese'ese.